

皇明象胥錄二

歸安茅瑞徵伯符撰

日本

日本國原名倭在大海中憑島以居三面環水唯東北限大山山外即毛人國凡島夷百餘不與中國通漢武帝滅朝鮮使驛通漢者三十許國皆稱王其大倭王居邪馬臺一謂之邪摩堆地勢東高西下建武中倭奴國奉貢朝賀使人自稱大夫倭之極南界也桓靈間倭國亂有女子名卑彌呼年

象胥錄二

日本

芝園藏板

長不嫁以妖惑眾共立為王法甚峻侍婢千人兵衛嚴設有男弟佐治國魏景初二年倭女王遣使朝獻制詔以為親魏倭王假金印紫綬後倭女王卑彌呼與狗奴國男王卑彌弓呼素不和相攻轉聞帶方郡為檄喻之卑彌呼死立男王國中不服爭誅殺乃立卑彌呼宗女壹與年十三其國遂定是後復立男王並受中國爵命晉安帝時有倭王贊四傳至武自稱使持節都督倭百濟新羅任那加羅秦韓慕韓七國諸軍事安東大將軍倭國王

宋昇明二年表稱祖彌東征毛人五十五國爰服
衆夷六十六國渡平海北九十五國句驪無道圖
見吞竊自假授詔除武使持節都督等號倭王如
故隋開皇二十年倭王姓阿每字多利思比孤遣
使詣闕訪以風俗使者言倭王以天爲兄日爲弟
天未明聽政跣趺坐日出停理務云以委弟其誕
妄類此大業三年復朝貢使者致詞聞海西菩薩
天子興佛法故遣朝拜兼沙門數十人來學國書
云日出處天子致書日沒處天子無恙帝不悅諭

象胥
錄二

日本

二一

芝園
藏板

鴻臚蠻夷書無禮勿以聞明年遣文林郎裴清使
倭度百濟行至竹島南望耽羅國廻在大海又東
經十餘國達海岸皆倭附庸倭王設儀仗鳴鼓角
迎勞復遣使隨清貢方物唐貞觀五年使來朝永
徽初其王孝德獻虎魄大如斗瑪瑙若五升器時
高麗百濟暴新羅賜璽書令出兵援之咸亨初王
總持遣使賀平高麗後稍習華音惡倭名更號日
本自以其國近日所出或云日本倭旁小國爲所
併冒其號長安元年其王文武遣朝臣真人粟田

來貢朝臣真人猶唐尚書也粟田工文好學開元
初復朝請從諸儒授經悉賞買書歸其副朝臣仲
滿願留歷左補闕多所該識久乃還天寶十二載
復朝會新羅梗海道朝貢更繇明越州是時倭女
王曰孝明孝明再傳爲女王高野姬貞元末其王
桓武遣使來朝學子留肄業歷二十餘年宋雍熙
初日本國僧裔然與其徒五六輩浮海至獻銅器
裔然衣綠自云姓藤原氏善隸書不通華言問土
風以書對其國有五經書佛經白居易集國王以

象胥
錄二

日本

三

芝園
藏板

王爲姓傳襲六十四世文武皆世官并獻本國職
員今王年代紀各一卷初主號天御中主次日天
村雲尊其後並以尊爲號凡二十三世都筑紫城
神武天皇徙大和州當周僖王時其後更以天皇
爲號及傳應神始於百濟得中國文字傳欽明併
得佛法傳用明有子七歲開悟講聖鬢經天雨曼
陀羅華當隋開皇中遣使泛海至中國求法華經
又傳孝德白雉四年律師道照求法至中國從三
藏僧玄奘受經律論又傳文武遣粟田真人入唐

求書籍又傳白瑩遣僧禮五臺山其間亦多女王
凡統五畿七道三島太宗召見奮然賜紫衣聞其
國一姓傳繼顧語宰相歎息久之天聖四年明州
言日本貢方物不持本國表詔卻其貢熙寧後時
有僧赴闕元世祖至元初遣使道高麗招諭不得
要領六年命秘書監趙良弼往始同彌四郎者入
朝十一年命鳳州經略使忻都等以九百艘掠其
境稍拔對馬一歧宜蠻各島十四年日本遣商持
金易銅錢十八年命右丞范文虎等率十萬人往
征抵五龍山遭風舟破士卒得生還者三人尋以
有事交趾不復議日本亦竟不至 明興頻寇山
東濱海州郡及淮安洪武二年以卽位頒諭仍掠
崇明四年

上遣萊州府同知趙秩泛海 賜璽書讓其王源
良懷良懷言蒙古嘗誅我好語隨襲以兵其使趙
姓今使者亦趙姓豈其裔耶擬兵之秩不爲動徐
宣諭朝廷威德良懷氣沮遣僧隨秩表貢方物送
回所擄明越人口

象胥
錄二

日本

四

芝園
藏板

上亦遣僧祖闡無逸報使然其寇掠自如始令閩浙造海舟備倭德慶侯廖永忠請令沿海軍衛添輕舸巡徼從之七年來貢無表文其臣亦私貢馬及茶布刀扇所奉丞相書甚諄

上怒郤其貢已因安置所遣僧於川陝十三年丞相胡惟庸謀逆潛納倭精銳貢艘爲應事泄著

祖訓勿復與通明年郤其僧如瑤貢命禮部以書諭責之十六年以信國公湯和巡視海上築登萊至浙並海五十九城二十年遣江夏侯周德興築

象胥
錄二

日本

五

芝園
藏板

福建並海十六城自南直山東及閩浙粵咸置行都司增屯戍嚴下海禁二十七年勅魏國公徐輝祖練浙兵海上永樂初其王源道義脩貢會對馬臺岐諸島夷數寇掠諭征捕獲渠魁以獻厚賚白金文綺子勘合百道令十年一貢使額無踰二百船止二艘勿挾兵器尋賜金印詔冊封爲日本國王名其國鎮山碑而銘之八年源道義死命鴻臚少卿潘賜往弔祭明年倭寇磐石十五年寇浙東海上多獻日本俘遣禮部員外郎呂淵等諭還

所掠明年其王源道特遣使奉表謝罪十九年以
三千人突寇遼東總兵劉江殲其衆初江閱地形
得金線島西北望海窩勢高峻扼海咽喉特爲增
築及偵倭至伏兵山下別遣奇兵焚舟斷其歸路
倭中伏擒斬且盡江以功封廣寧伯自是倭不敢
復窺遼宣德初以倭貢踰約申定格例然倭自得
我勘合多指稱貢舶藏兵刃備謹卽貢備弛卽掠
貢卽愆期所司不敢深摘聽抵 京師宴賚市易
飽飫而去稍睨疎防蹈瑕殺擄捆載固未已也正

象胥
錄二

日本

六

芝園
藏板

統後海上防漸疎四年倭船四十餘夜入大嵩港
轉破昌國衛城恣焚掠於是申嚴斥堠合兵分番
沿海寇盜稍戢成化二年連寇大嵩四年鄞人林
從傑等三輩轉掠爲通事隨倭使人貢奏乞歸省
許之仍禁勾引通番十三年倭忽至寧波現有備
詭云脩貢庶吉士楊守陳貽書主客極言倭借貢
蓄奸請得謝絕不從正德四年其王源義澄遣宋
素卿來貢素卿者故鄞人朱縞也弘治中逋歸倭
有寵于其王僞充正使其叔朱澄識之守臣覺發

以厚賂巨璫劉瑾置不問令還諭王無盜邊因求
祀孔子儀注不許嘉靖二年素卿再至時其王源
義植孱闇諸島強請勘合爭入貢邀利左京兆大
夫藝興遣僧宗設右京兆大夫高國遣僧瑞佐及
素卿踵及寧波故事凡番貢至閱貨宴席並以報
至先後爲序素卿狡賄市舶中官賴恩撓閱瑞佐
貨及宴又引坐宗設上席間爭長相讐殺而宗設
黨盛尾追素卿及紹興臨城索不得遂躡旁邑殺
備倭都指揮劉錦去已因漂入朝鮮其王李懌得

象胥
錄二

日本

七

芝園
藏板

二倭獻

上以臺省糾叅下素卿獄并二倭繫論並瘦死特
遣給事中劉穆往浙體訪兼飭武備四年縱日本
僧妙賀等歸國諭其王捕宗設九年琉球請封道
日本附表乞貫素卿并懇新勘合脩貢禮部驗表
文無印請勅琉球傳諭自是絕貢者十七年尋再
至以違格罷初方國珍張士誠分據溫台寧紹諸
郡並瀕海及已降滅而餘黨逋海上輒糾島倭入
寇以故洪武中瀕海州郡數中倭

高皇帝業增置戍守又命南雄侯趙庸招集蛋戶
漁丁之族自淮浙暨閩廣幾萬人悉藉爲兵於是
海上羣惡少皆仰給縣官而方張餘黨亦以次老
死瀕海因得息肩永樂西洋之役華人習知海外
饒有琛怪旣生艷慕而貢夷往來益習我海道曲
折糾引蔓附剽寇復起至是以科臣言併罷市舶
而利孔反爲奸商所竊每番舶至以虛詞餽取轉
展賒負絕不償直久乃投豪貴家豪貴家侵牟眚
奸商逾甚番人坐索動以危言撼當路驅逐又先

象胥
錄二

日本

八

芝園
藏板

期漏語使逸以示德陰握全利其後番人聞而飲
恨盤據海洋必切有其貲蓄乃已而亾命不逞強
有力者復入海聚衆爲舶主行賈閩浙以財役屬
勇悍倭闌入互市乘機剽掠如許棟王直徐海實
繁有徒海上因之多事焚劫寧台幾無寧歲矣二
十六年始設浙江巡撫都御史兼領興福漳泉治
兵捕賊以朱統爲之純清勁果於任事日夜詰兵
嚴糾察根株通海窟穴遂搗雙嶼擒巨酋許棟因
上章鑄暴二三渠魁侵豪貴諸豪屏息切齒亡何

諷臺省奏改統爲巡視竟以專殺奪官并下統同
事海道副使柯喬都指揮盧鏜于理詠統飲藥自
殺兼弛海禁而東南瀕海寇益恣無敢呵者三十
年王直突入定海關明年壬子倭犯台州破黃巖
縣自象山流劫郡邑復簡都御史王忬巡視浙江
及興福漳泉海道添設叅將二員以都指揮俞大
猷湯克寬分浙閩轂勦而幕府久廢兵政積弛士
柔脆不習戰鬥忬至請假事權募梟勇徵狼土諸
兵規畫稍定明年癸丑倭犯温州大猷冒險出洋

象胥
錄二

日本

九

芝園
藏板

擣穴羣賊駭散狂突克寬統部卒東西馳擊頗獲
首功而賊勢張甚王直各部擁漳廣羣盜合島倭
連艦百餘破南滙所薄太倉入上海遂圍海鹽掠
平湖陷昌國衛臨山所再攻海寧衛破乍浦延及
寧海奉化諸邑凡畱內地三月所在焚蕩西犯松
陽北侵海州而福寧秦嶼所亦遭寇頃之以兵科
奏改忬巡撫提督軍務湯克寬以副總兵屯金山
忬薦盧鏜代以俞大猷總浙直兵時任環以雄略
自府同知擢備兵蘇松松陽令羅拱宸亦以知兵

超陞浙憲也其秋倭流劫興化擊卻之它部據南沙踰五月明年甲寅春潰圍出嚙蘓松旁邑北掠通州如臯海門改兵部侍郎屠大山爲應天都御史亦以巡撫兼提督倭續自南沙登岸湯克寬敗之採淘港而俞大猷勦普陀倭爲所乘叅將盧鏜禦之嘉興再戰孟家堰亦敗遂陷嘉善焚運艘轉攻嘉興府因我師迎擊遁乍浦合長沙灣寇且東掠崇明而慈谿忽報地湧血尺餘本兵條上方略始議重賞招巨酋王直矣兵科疏駁

象胥
錄二

六
日本

十

芝園
藏板

上是之命一意主勦是時

天子蒿目東南特採廷臣言命南京兵部尚書張經開府總督直浙福廣山東軍務經故嘗督兩廣著績會議徵狼土兵扼倭乃用經節制當天下半得辟召叅佐便宜從事經亦慷慨以盪寇自負中外企踵謂倭旦晚可盡也亡何都御史王忬改撫山西代以徐州兵備李天寵忬規度浙閩頗有緒以弛擔中輟而經以留京遙制鞭長不及羽檄征調不能猝佐緩亟再奉嚴旨專閫所起宿將何卿

沈希儀等又嘆惜不爲用以是訖無成功始倭還屯柘林進薄嘉定叅將李逢時募山東槍手六千人適至敗之新涇橋追奔中伏復潰詔建屠大山禱爲民改張經右都御史專總督而倭連犯海門金山青村所續至萬餘流突樂清黃岩諸縣柘林倭且分掠嘉湖我師禦之窰墩失利是歲量蠲被倭郡邑田租罷浙歲貢魚鮮而倭據川沙窪柘林爲穴明年乙卯柘林倭奪舟犯乍浦陷崇德轉掠湖州新倭日增唯兵備任環督舟師敗之南沙

象胥
錄二

日本

十一

芝園
藏板

斬級百餘會所調田州瓦氏等狼土兵至蘇人心稍定而工部侍郎趙文華且報祀海神督察江南也文華故事輔臣嚴嵩兼挾

上寵欲順指督臣經出其上經自以宿望不爲意心脚之時狼土兵新集銳請擊倭趨利文華促經經欲候所徵永保兵并力以文華佻妄不敢漏師期而江北三丈浦川沙窪倭報日至文華以經固老師觀望也亡何柘林倭三千餘矚金山俞大猷迎擊大潰遂犯嘉興時永保兵則已集軍門矣經

遂遣叅將盧鏜等督狼土等兵水陸遮擊石塘灣
倭敗奔平望回走王江涇副總兵俞大猷以永保
兵夾擊遂大敗之共斬級千九百八十有奇溺死
無筭倭大氣奪而

上入文華言業遣緹騎建經捷聞兵科留經乘勢
進擣

上惑相嵩歸功文華及御史胡宗憲 賜金幣經
功自如不爲貫經去而軍中解體尋以應天都御
史周琬代琬罷改戶部侍郎楊宜並齷齪無將略

象胥
錄二

日本

十二

芝園
藏板

倭勢復張頃之任環及俞大猷等攻倭陸涇填斬
級二百七十有奇焚舟三十時柘林白茆三丈浦
倭並奪舟遁我師遮擊多擒斬它倭百餘從會稽
高埠流劫杭歙直趨南京已又徐從宜與轉入滄
墅應天都御史曹邦輔督師殲焉趙文華計攘首
功矚柘林餘倭穴陶宅大集浙直兵會勦失利已
而倭遁周浦突圍與川沙窪倭合我師邀擊破之
文華遽報蕩平歸朝而浙福都御史李天寵建訊
與張經並死西市以宗憲代皆文華之爲也是歲

日照莆田福清並有倭警明年丙辰以文華言遂擢宗憲代宜總督倭聚新場任環督永保兵進勦再潰因建曹邦輔謫戍邊尋以叅政阮鶚代宗憲督軍務而倭慘掠慈谿巨酋徐海衆復大至一由海門一由松江一由定海關而海自擁部萬餘導所窟柘林酋陳東併兵逼乍浦已聞督撫移師遂從硤石趨皂林鶚以輕舸馳入桐鄉令河朔將宗禮引所部兵九百遮倭擊殺數百人海爲辟易以援絕火藥盡前迫橋陷與驍將霍貫道俱死之倭

象胥

日本

十三

芝園

藏板

錄二

遂乘勝圍桐鄉急引撞竿撞城城幾壞城上人以縵索挽上斷竿又煮鐵汁灌城下所以堅守百方倭稍卻亦會總督間使人持重賂說海罷圍且疑陳東以携其交海驟道崇德西遯東留攻一日勢孤亦引去桐鄉圍始解而趙文華復以尚書督師始文華言江南殘倭易殄頃更蔓延上覺其欺相嵩爲營特遣已至浙則與宗憲圖襲海宗憲日夜啗海金帛祥約擊吳淞江倭縱奪舟去以遲援兵之集諜聞海麾下書記酋葉麻最黠

與海爭一女子相失因諷海縛麻而陳東以桐鄉之役睚眦與葉麻聲相倚更遣諜持璣翠遺海侍女說海并縛東且詐爲葉書遺東陰泄之海海得書泣下心德宗憲竟縛東以報麻與東相繼縛則海部曲內亂因說海至平湖庭謁堅約令海與陳東黨分屯沈庄輒詭爲謀令兩相悞至稍而鬪乃督永保兵如墻進乘風縱火海窘沉河死殲其黨俘葉麻陳東獻遂進文華少保宗憲右都御史餘倭窟舟山俞大猷攻之未下會夜大雪督兵擲火

日本

十四

芝園藏板

象胥錄二

焚其柵盡復斬級百四十餘是歲倭突古田潮州明年丁巳併獲巨酋王直王直故欵人走海上爲舶主頗任俠島主並嚴事之他舶往往借名行入掠托之直跡故秘先是宗憲以頻歲苦倭特海上亾命勾引島夷內訌其國王故未之知也疏得遣使諭日本王禁戢報可以郵諸生蔣洲陳可願往而宗憲以鄉曲習知直迎直母妻至慰藉甚厚因遣洲等間過直所洲等遇直五島直爲言日本方亂諸島不相攝誠貫直等通貢互市願擊賊自

効遂留洲往諭各島別遣養子王澈毛臣先後投款宗憲結以重賂且令間說徐海已而遣諭直降爲置司海上通互市直亦自分能力主島夷欲詣宗憲面相結謬以豐洲王入貢爲名泊岑港宗憲又厚餽遣遣指揮夏正等爲死間直遂挺身入杭州宗憲曲諭直佯羈獄具疏聞上不敢深悉其故廷議以直元兇坐棄市宗憲得加太子太保餘遷賞有差而直黨三千人竄據岑港及舟山遂流劫浙東江北蔓延閩粵時阮鶚以都御史移撫閩而倭掠泰州淮安入寶應叅將劉顯率苗兵敗之東鄉多焚溺明年戊午倭犯興泉境遂陷福清南安以岑港倭阻守奪總兵俞大猷秩命兵部郎中唐順之視師浙直明年己未倭流劫揭陽福安及浙西象山攻桃渚所而岑港倭自柯梅趨泉州浯嶼閩人大譁宗憲縱寇詔建大猷卽訊尋釋立功江北倭數道入都御史李遂馳如臯部諸將無令越天長瓜儀尾及廟灣絕地督兵圍勦遂大破之斬級八百有餘已又遣劉顯殲倭劉家庄自壬子

象胥
錄二

日本

十五

芝園
藏板

倭入黃岩至是首尾八年江南北略平浯嶼倭亦旋遁總督胡宗憲用間力爲多四十一年以言官論劾建宗憲至京尋釋之罷浙福總督而閩倭復告急初倭阻寧德之橫嶼連營負險叅將戚繼光至令人持束草填河進力戰斬級二千六百餘生擒踰九十乘勝勦福清倭復破之因引兵還浙遇倭自東營澳登岸迎斬百八十級遂去而倭勢轉熾明年進薄興化城攻圍匝月叅將劉顯頓兵不敢進及城陷復命繼光及俞大猷馳援時倭巢平

象胥
錄二

日本

十六

芝園
藏板

海衛欲逸爲俞大猷所扼與繼光夾擊縱火糜巢中仙遊連江諸寇悉平倭盡走廣東界方繼光抵福清父老請師期繼光曰吾遠來疲甚且休矣偵者歸語弛不爲備其夕銜枚疾馳三十里黎明逼其巢大呼縱擊倭披靡莫敢枝梧已破倭歸邑人未知兵出也廣東倭屯潮之烏石爲俞大猷所破逃至甲子門將入海風暴盡溺餘衆二千留屯海豐大猷圍之食盡思遁副總兵湯克寬伏兵擒勦且盡倭患遂息維時四十三年計海氛踰一紀始

靖而受害浙最劇次南直次閩又次粵城邑燼於
兵火子女窘於攘攸行齋居送累鉅萬萬東南脂
髓幾於盡吸而倭亦連舶不獲返然率海上奸氓
爭以入寇之利餌倭中無賴少年藉爲前行推波
鼓譟其間真倭僅十之一二絕與其國王不相聞
前遣蔣洲至豐後島轉諭山口所據山口都督源
義長及豐後太守源義鎮並具咨表貢方物謝罪
量犒其使令浙藩司移咨義鎮等轉諭王鈐束亦
杳無報命者自是海上封守益密日本遂絕朝貢

象胥
錄二

日本

十七

芝園
藏板

隆慶時海寇曾一本等勾引犯閩粵我亦嚴備旋
及撲滅非復鸞發如嘉靖之季矣萬曆二十年倭
酋關白平秀吉募立遣酋清正行長侵朝鮮猝陷
慶尚道掠開城繞出平壤西其王盼令次子暉攝
國事走義州求內屬命兵部侍郎宋應昌督總兵
李如松等勒兵七萬往援明年春戰平壤攻牡丹
臺大破之得級千二百八十五倭奔王京我師略
地碧蹄中伏敗衄已申款倭棄王京棲釜山朝鮮
王遂復國因撤師渡江歸又明年議封秀吉爲日

本王倭中變又明年復命總督侍郎邢玠經略以
總兵麻貴濟師都御史楊鎬特開府天津經理朝
鮮倭酋清正屯蔚山與釜山倭犄角我師至則圍
蔚山絕餉道倭饑佯約降而行長從釜山聲援張
虛幟蔽江我師遽撤爲倭襲擊大潰時戊戌正月
也會別將陳璘劉綎先後至分水陸四路進勦稍
有斬獲明年九月秀吉死遮擊歸倭以捷聞凡拮
据八年而後定其後對馬島倭與朝鮮復私款三
十七年倭酋玄蘇等稱奉國王源秀忠命假道朝
鮮修貢是時薩摩州倭并琉球叢取雞籠淡水啜
閩廣四十年冒琉球入貢卻之明年倭酋平義智
請貢路 詔飭防海上四十四年三月肥前州歸
我把總董伯起初議封平秀吉或云日本王見住
山城關白名號如漢大將軍秀吉死遺孤秀賴甫
七齡爲娶巨酋家康女孫令家康協輔與薩摩州
太守平義弘抗不相下頃家康故自長歧島外勢
頗携始家康擱焉窺南鄙而長歧之酋曰等安卽
桃員者得罪家康懼爲所滅請取東番自贖遂令

次子秋安連犯閩之東湧大金尋家康死而局中
變或云家康傳位其子秀忠稱新關白其詳不可
深考然聞薩摩州於倭諸島兵最勁俗喜鬪以良
死爲無勇諸島皆憚其銳前此入寇亦多薩摩肥
後長門三州人巨酋陳東卽薩摩州王弟之書記
也次則大隅筑前筑後博多日向及豐前豐後和
泉諸島日本主以山城爲都山城君號令久不行
金印勘合向入山口自山口亾并不知所歸諸島
酋長競相攻強則役屬嘉靖時豐後爲大兼有肥
後等六島及平秀吉雄據六十六州今亦寢微國
中殆無常尊云大抵倭舶之來利東北風唯清明
後爲多而重陽後間有之故防海以三四月爲
大汛九十月爲小汛其帆檣所指一眎風候有備
者勝按胡松海圖說曰始倭通中國自遼東今乃
從南道浮海率自温州寧波入其西北至高麗必
由對馬島開洋順風僅一二日南至琉球必由薩
摩州開洋順風七日其貢使之來必由博多開洋
歷五島入中國以造舟水手俱在焉若入寇則隨

風所之東北風猛則由薩摩或五島至大小琉球而仍視風之變北多則犯廣東東多則犯福建若正東風猛則必由五島歷天堂官渡水而視變遷東北多則至烏沙門分鯨或過韭山海關門而犯温州或由舟山之南而犯定海犯象山奉化犯昌國台州正東風多則至李西魯壁下陳錢分鯨或由洋山之南而犯臨觀錢塘或由洋山之北而犯青村南滙犯太倉或過南沙而入大江若在大洋而風歛東南則犯淮揚登萊若在五島開洋而南

象胥
錄二

日本

二十

芝園
藏板

風方猛則趨遼陽趨天津其大較若此矣性輕生好鈔掠尤耽麩蘘餅奕棊及雙陸略通草書男子魁頭斷髮黥面文身婦人被髮屈紒衣如單被穿其中以貫頭皆跣足間用屨板屋布地以砂所佩刀極犀利每戰赤體單列提刀突前爲蝴蝶陣以揮扇吹海螺爲號工設伏船製大者容三百人然卑隘遇巨艦難於仰攻且苦犁沉廣福船皆所畏海水鹹不可飲其來開洋必取水五島抵中國境復停舶換水土溫煥宜禾稻產金銀琥珀水晶硫

黃水銀銅鍍白珠青玉蘇木胡椒細絹花布螺鈿
灑金漆器扇犀象刀劍互市華人喜得錦綺絲綿
磁針貢道故由寧波今久絕而通番人日衆

論曰史稱倭在會稽之東晉夏少康有子封會稽
斷髮文身以避蛟龍之害今倭好沉沒取魚亦文
身厭水禽俗殆近之魏志次倭旁國夥矣其二始
渡海千餘里至對馬國今倭島名對馬近朝鮮豈
卽其遺域與往海上國凡百餘統以大倭王項諸
島各爲雄長山城君寄空名其上意略似而強弱
不類然倭自通中國歷二千有餘載或貢或否不
聞躡及內地而獨祭難 本朝至嘉靖季沿海郡
邑焚劫略盡則皆華人嚮導而通番之爲祟烈也
鄭端簡謂市舶不可罷江南海夷有市舶所以禁
海賈而抑奸商而俞大猷言倭市僅刀扇我獲利
薄又易蔓禍

高皇帝禁通貢意甚遠唯察風候而以舟師扼之
鯨波乃爲長畫大猷以信國裔習海上事當有徵
矣卽胡宗憲執訊獲醜洵有大造東南比於朱統

猶為焦爛餘智策倭今日其亦審所畫哉



象胥
錄二

日本

主

芝園
藏板